

Tuesday, November 18, 2025

Time - 2:30pm - 2:35pm

**AKASHVANI AIZAWL
REGIONAL NEWS UNIT**

**REGIONAL NEWS BULLETIN
(MIDDAY)**



CM

Chief Minister Pu Lalduhoman Adviser to CM Pu TBC Lalvenchhunga, MLA-in Adviser to Chief Minister a nihna atanga banna a thelloh chu a pawm loh thu a sawi.

Vawiina MLA atana Dr. R Lalthangliana lakloh inkhawm zawhah thuthar thehdarhtuten Chief Minister chu Adviser to CM Pu TBC Lalvenchhunga banna a thelhut nia sawi chu a dik leh dik loh an lo zawt a, Chief Minister chuan a banna chu a pawm loh thu a sawi a ni.

(Byte - Chief Minister)

Pu TBC Lalvenchhunga hi Aizawl West-I bialtu MLA a ni a; Chief Minister in adviser 5 a neih zinga 1 niin, Finance chungchanga Chief Minister puitu, Adviser to CM (Finance) a ni mek a ni.



MLA

Dampa bial by-election a MLA atana thlan tlin Dr. R. Lalthangliana, MNF sr. vice president chu Assembly Speaker Pu Lalbiakzama'n rinawmna thu tiamtirin MLA atan a la lut.

Lakluh inkhawm hi Assembly Annexe Conference Hall-ah neih a ni a, Speaker Pu Lalbiakzama chuan Dr R Lalthangliana chu Mizoram Legislative Assembly 9-naa legislator tha tak ni turin duhsak a hlan nghal a ni.

Dr R Lalthangliana hi tun by election nen chhiar telin MNF ticket-in MLA atan vawi 7 thlan tlin a ni tawh a - kum 1989 khan a vawi khat nan Lunglei North bialah MLA atan thlan tlin niin, Lunglei North bialah vêk hian kum 1993, 1998 leh 2003 khan thlan tlin leh a ni. Kum 2008 khan Lunglei West bialah a tling leh a, kum 2018 khan South Tuipui bialah thlan tlin a ni tawh bawk.

Kum 2023-a 9th Mizoram Legislative Assembly inthlanpuiah khan South Tuipui bialah MNF ticket in a ding leh a, thlan tlin ni lo mahse Dampa Bial by-election ah thlan tlin niin, MLA atana thlan tlin a nih vawi 7-na a ni.



MEDIA WORKSHOP “VARTALAP”

Information & Public Relations Minister Pu B. Lalchhanzova'n vawiin khan DIPR Auditorium ah Ministry of information and Broadcasting hnuaia Press Information Bureau, buatsaih, One Day Media Conclave 'Vartalap' - thupui hrang hrang zirhona hun a hmanpui.

He workshop-ah hian GST dan thar chungchang leh National Song kumina kum 150 tling Vande Mataram bakah Adi Karmayogi Abhiyaan chungchang zir ho a ni a, Pu B. Lalchhanzova chuan Vartalap chu sawrkar laipuiin hnam inpumkhatna atana a hmalakna kawngah thil pawimawh tak a ni a ti a, National Song Vande Mataram chu India mipuite min phuar khawmtu leh ram dang hriat phaka India mipuite chawisangtu a ni a ti a, Vande Mataram chuan India hmasawnna a thlen tih sawiin ram inpumkhatna atan a pawimawh takzet a ti a, Ram leh Hnam inpumkhatna chu khawvel thang mekah ngaih pawimawh a hlawh zel dawn tih a sawi.

I & PR leh Printing & Stationary Department changtu Minister Pu B. Lalchhanzova chuan GST dan thar chu a tirah huphurhawm viauin lang mahse mitin nunphung ziaawm na tur zawk a ni a ti a, Mizoram ei leh bar dinhmun thlak danglam thei ani tih sawiin hei hian hmasawnna lian zawk a thlen dawn a ti a, Mipui mimir khawsak harsa thlengin a tha zawngin nghawng a nei tih sawiin mipuite hmasawnna a thlen tih a sawi.

Pu B. Lalchhanzova chuan chhiah chu hremna dan nilovin chhiah pe theia awm chu malsawmna zawk ani a ti a, ram tan mipuiten hna an thawk ve ani tih lantirna ani tih sawiin Mizoramah pawh chhiah mumal taka lak anih theih nan theihtawp chhuah ani a ti a, sawrkar laipui ring ringawt lova mahni inchawm zo ve thei turin zawi zawia tan an ngai tih a sawi.

Minister chuan Mipuiten sawrkar laipui scheme ngaih pawimawh a ngai tih sawiin hamthatna awm thei leh hmasawnna thlen thei hrang hrang ngaihven a pawimawh a ti a, sawrkar laipuiin hnam hnufual chawikan a ngai pawimawh thin chu lawmawm atih thu sawiin tunlai thiamna leh khawvel hmasawnna kawnga intlansiakna kawngah midangte ban phak turin nasa takin

a pui a ti a, hmasawnna tam zawk a awm theih nan theihtawp a chhuah dawn tih a sawi.

Pu HK Lalhawngliana chuan Mizoram chhiah lakkhawm chuan ziaawm lam a pan zel tih sawiin mipuite an harh thar chho mek a ti a, GST dan thar chuan Mizoram eizawnna kawngah hmasawnna a thlen dawn tih sawiin Chhiah lak dan mumal zawk buaipui mek ani a ti bawk.

Vawiina hun hmanah hian hriat tur Resource Person Prof Ayangbam Shyamkishor, Prof James LT Thanga leh Planning Department Deputy Adviser Pi Biakthansangi Hrahsel te hnen atangin GST leh Vande Mataram bakah Adi Karmayogi Abhiyan chungchang ngaihthlak a ni a. Vawiin Program-ah hian PIB staff, AIR staff, Doordarshan staff te leh MZU leh ICFAI zirlaite an tel a, heng bakah hian thuthar lakhawmtute leh sawm bik mi pawimawhte an tel bawk.



RAJASTHAN MINISTER

Rajasthan State a Panchayati Raj Minister Pu Madan Dilawar leh amah zuitu official leh Panchayati Raj member hrang hrang mi 21-te chuan, Ministry of Panchayati Raj (MoPR) hnuaia Scheme pawimawh tak, Rastriya Gram Swaraj Abhiyan (RGSA) hnuaia hnathawh hrang hrangte rawn en thlithlai pahin Mizoram Exposure Visit an rawn nei a; vawiin chawhma khan RD&AD Minister Prof. Lalnilawma chuan a Office chamber-ah lo kawmin sawrkar hmalak dante sawi hona hun an hmang a ni.

Prof. Lalnilawma chuan, Mizoram ngai pawimawha rawn tlawhtu Pu Madan Dilawar leh amah zuitu official-te’n hetiang a intlawh chhuahna hun an rawn nei chu, lawmawm a tih thu sawiin, ram leh ram intlawhtawna, inzirtawn thin chuan rah tha tak a chhuah zel a beisei thu a sawi a; thingtlang hmasawnna atana hmalakna hrang hrangahte pawh, hna thawh dan tha zawk leh chin dan tha zawkte chhar chhuaha, in entawn zel theih a nih tur thu a sawi.

Pu Madan Dilawar leh amah zuitu mi dangte pawhin Mizoram chu nuam an tih thu leh, sik leh sa mai bakah ramngaw, thing leh mau te chu hmuhnawm an tih thu sawiin, mizo mipuite hawihhawmna chu mawi an tih thu an sawi a, Rajasthan tlawh ve thuai turin RD&AD Minster leh a thawhpuite chu an sawm nghal bawh a ni.

